

დამტკიცება: კავკასიის უნივერსიტეტის მმართველი საბჭოს
2019 წლის 6 სექტემბრის დადგენილებით N07

კავკასიის უნივერსიტეტის
სახანძრო უსაფრთხოების წესი

2019

კავკასიის უნივერსიტეტის

სახანძრო უსაფრთხოების წესი

მუხლი 1. ზოგადი დებულებანი

1. შპს "კავკასიის უნივერსიტეტი"-ს (შემდგომში "უნივერსიტეტი") მდებარე მისამართზე: ქ.თბილისი, პაატა სააკაძის ქ. №1, სახანძრო უსაფრთხოების წესი (შემდგომში "წესი") შემუშავებულია „სამოქალაქო უსაფრთხოების შესახებ“ საქართველოს კანონის, „სახანძრო უსაფრთხოების წესებისა და პირობების შესახებ ტექნიკური რეგლამენტის დამტკიცების თაობაზე“ საქართველოს მთავრობის 2015 წლის 23 ივლისის №370 დადგენილების და უნივერსიტეტის დებულების საფუძველზე.
2. წინამდებარე წესი წარმოადგენს ნორმატიულ სამართლებრივ აქტს, რომელიც ადგენს ქვევის სავალდებულო წესებს, რომლის დაცვა და შესრულება სავალდებულოა უნივერსიტეტის თანამშრომლებისათვის, სტუდენტებისათვის და ხელშეკრულებით უნივერსიტეტთან დაკავშირებული ორგანიზაციების თანამშრომლებისათვის, რომლებიც სამსახურებრივ ფუნქციებს ასრულებენ უნივერსიტეტის ტერიტორიაზე.

მუხლი 2. ხანძარსაწინააღმდეგო უსაფრთხოების უზრუნველყოფა

1. სახანძრო უსაფრთხოების წესების დაცვასა და შესრულებაზე კონტროლს ახორციელებს უნივერსიტეტის პრეზიდენტი.
2. სახანძრო უსაფრთხოების წესების დაცვაზე მონიტორინგს ახორციელებს და წინამდებარე წესით დადგენილი ღონისძიებების შესრულება ევალება უნივერსიტეტის ლოგისტიკისა და უსაფრთხოების დეპარტამენტს (შემდგომში „დეპარტამენტი“).
3. უნივერსიტეტში ყველა სართულზე თვალსაჩინო ადგილას გამოკრული არის სავალდებულო გეგმა, ევაკუაციის პროცედურები, რომლის შესაბამისად საჭიროების შემთხვევაში მოხდება შენობის უსაფრთხო დატოვება.
4. უნივერსიტეტი აღჭურვილია შესაბამისი ხანძარსაწინააღმდეგო ინვენტარით, ცეცხლმაქრით, რომელიც განათავსებულია სპეციალურად გამოყოფილ ადგილებში და მისი გამოყენების ინსტრუქცია გამოკრულია აღნიშნულ ინვენტართან და ახსნილია უნივერსიტეტის სტუდენტებისა და პერსონალისათვის.
5. უნივერსიტეტის მთელ ტერიტორიაზე (შენობასა და ეზოში) აკრძალულია თამბაქოს/ელექტრონული სიგარეტის მოხმარება.
6. ხანძარსაწინააღმდეგო დაცვის სისტემების ტექნიკური საშუალებების ეფექტური მუშაობის უზრუნველსაყოფად, უნივერსიტეტის პრეზიდენტი ნიშნავს ხანძარსაწინააღმდეგო დაცვის სისტემების ექსპლუატაციაზე, ტექნიკურ მომსახურებაზე, მათ შეკეთებაზე, დაცვასა და გამოყენებისათვის მზადყოფნაზე პასუხისმგებელ პირს.
7. უნივერსიტეტის პრეზიდენტი განსაზღვრავს ხანძრის ჩაქრობის პირველადი საშუალებების შენახვასა და მოქმედებისთვის მზადყოფნაზე პასუხისმგებელ პირს.
8. სახანძრო უსაფრთხოების უზრუნველყოფაზე პასუხისმგებელი პირები ვალდებული არიან დროულად და სათანადოდ უზრუნველყონ სახანძრო უსაფრთხოების მოთხოვნების შესრულება.

9. პასუხისმგებლობა წინამდებარე წესით დადგენილი სახანძრო უსაფრთხოების მოთხოვნების დაცვაზე უშუალოდ სამუშაო ადგილებზე ეკისრებათ უნივერსიტეტის თანამშრომლებს.

10. თანამშრომლები, რომლებსაც ევალებათ უნივერსიტეტში ხალხმრავალი ღონისძიებების ჩატარება, ვალდებული არიან ღონისძიებების დაწყებამდე ყურადღებით დაათვალიერონ სათავსები და დარწმუნდნენ მათ უსაფრთხოებაში ხანძარსაწინააღმდეგო თვალსაზრისით.
11. უნივერსიტეტის ყველა თანამშრომელი ვალდებულია:
 - ა) დაიცვას სახანძრო უსაფრთხოების მოთხოვნები;
 - ბ) სამუშაოს დასრულების შემდეგ გამორთოს პერსონალური კომპიუტერი ან/და სხვა ელექტროხელსაწყოები;
 - გ) სამუშაოს დამთავრების შემდეგ, ოთახის დაკეტვის წინ, ჩაატაროს დათვალიერება, გამორთოს ელექტროხელსაწყოები და განათება;
 - დ) დაიცვას უსაფრთხოების ზომები ადვილად აღებადი და წვადი სითხეების და აირების, სხვა ხანძარსაშიში ნივთიერებების, მასალების და მოწყობილობების გამოყენებით სამუშაოების შესრულებისას;
 - ე) იცოდეს ხანძრის დროს ევაკუაციის გეგმა და ცეცხლმაქრების განთავსების ადგილები;
 - ვ) ევაკუაციისას შენობიდან გასვლა მოახდინოს ევაკუაციის გეგმის შესაბამისად და არ გამოიყენოს ლიფტი;
 - ზ) იცოდეს ცეცხლმაქრებით სარგებლობის ხერხები;
 - თ) არ ჩახერგოს საევაკუაციო გზები და გასასვლელები;
12. თანამშრომლებს ეკრძალებათ:
 - ა) სათავსებში ადვილად აღებადი, წვადი და ფეთქებადი ნივთიერებების შენახვა;
 - ბ) თამბაქოს მოწევა უნივერსიტეტის ტერიტორიაზე (შენობასა და ეზოში);
 - გ) უნივერსიტეტის შენობაში ქაღალდების ან სხვა ადვილად აღებადი ნივთიერებების ღია მდგომარეობაში დაყრა;
 - დ) უნივერსიტეტში ღია ცეცხლის გამოყენება;
 - ე) არაქარხნული წესით დამზადებული და გაუმართავი ელექტროხელსაწყოებისა და ელექტროინსტრუმენტების გამოყენება;
 - ვ) ქსელში ჩართული ელექტროხელსაწყოების უმეთვალყურეოდ დატოვება.

მუხლი 3. ლოგისტიკისა და უსაფრთხოების დეპარტამენტის თანამშრომელთა ვალდებულება

1. ხანძრის გაჩენის შემთხვევაში, ლოგისტიკისა და უსაფრთხოების დეპარტამენტის თანამშრომელთა მოქმედებები უნდა იყოს მიმართული ადამიანთა უსაფრთხოების უზრუნველყოფასა და მათ დროულ ევაკუაციაზე.
2. სახანძრო უსაფრთხოების უზრუნველყოფისთვის დეპარტამენტის ყველა თანამშრომელი ვალდებულია:
 - ა) იცოდეს ელექტროენერჯის მოწოდების წყარო, მისი საერთო გამომრთველის ადგილმდებარეობა, ხოლო ხანძრის ან ასეთის წარმოქმნის საშიშროების შემთხვევაში, დაუყონებლივ გათიშოს ელექტროენერჯის მოწოდების წყარო.

ბ) იცოდეს ცეცხლმაქრი სისტემების გამოყენება, მათი ვარგისიანობის ვადა და შევსების დრო, ასევე პერიოდულად უნდა ამოწმებდეს ცეცხლმაქრების მდგომარეობას.

გ) მონაწილეობა მიიღოს ხანძარსაწინააღმდეგო ინსტრუქტაჟის პროცესში.

დ) შენობიდან გასვლის წინ შეამოწმოს უნივერსიტეტის მთლიანი შენობა, გამორთოს ელექტროენერგია, გამართულ მდგომარეობაში დატოვოს სიგნალიზაცია.

ე) ხანძრის გაჩენის შემთხვევაში, მათი მოქმედება მიმართული უნდა იყოს ადამიანთა უსაფრთხოების უზრუნველყოფასა და მათ დროულ ევაკუაციაზე; დროულად მიუთითოს ადამიანებს საევაკუაციო გასასვლელ(ებ)ისკენ.

ვ) მის ხელთ არსებული ყველა საშუალების გამოყენებით განახორციელოს ცეცხლის ქრობა და მისი ლოკალიზება, თუ ეს არ აღემატება მის შესაძლებლობებს; გამოიძახოს სახანძრო-სამაშველო სამსახური, ასეთის საჭიროების შემთხვევაში.

ზ) ადგილზე მოსულ მაშველებს მოახსენოს საქმის ვითარების შესახებ და მათთან ერთად განაგრძოს ცეცხლის ქრობა. ხანძრის ჩაქრობის ხელმძღვანელს მიაწოდოს ინფორმაცია შენობის კონსტრუქციული თავისებურებების, სათავსებში არსებული ნივთიერებებისა და მასალების ხანძარსაში თვისებების შესახებ.

მუხლი 4. ხანძრის შემთხვევაში უნივერსიტეტის თანამშრომლების და სტუდენტების მოქმედების წესი

1. უნივერსიტეტში ხანძრის ან წვის ნიშნების (დაკვამლიანების, დამწვრის სუნის, ტემპერატურის აწევის და ა.შ.) აღმოჩენის შემთხვევაში, უნივერსიტეტის თითოეული თანამშრომელი და სტუდენტი ვალდებულია:
 - ა) შეწყვიტოს სამუშაო (სწავლება), დაუყოვნებლივ შეატყობინოს აღნიშნულის შესახებ სახანძრო-სამაშველო სამსახურს ტელეფონით “112” და მორიგე ჯგუფს (ამასთან აუცილებელია დაასახელოს ობიექტის მისამართი, ხანძრის გაჩენის ადგილი);
 - ბ) შეძლებისდაგვარად მონაწილეობა მიიღოს ადამიანთა ევაკუაციაში, მატერიალურ ფასეულობათა გადარჩენასა და ხანძრის ჩაქრობაში;
 - გ) გათიშოს დენის წყაროდან სათავსოში არსებული, მასზე განპიროვნებული ელექტროდანადგარები და ხელსაწყოები;
 - დ) მომხდარის თაობაზე შეატყობინოს უნივერსიტეტის ადმინისტრაციას, ასევე აცნობოს გარშემო მყოფ მოსამსახურეებს;
 - ე) საშიშროების საერთო განკარგულების მიღებისას დატოვოს უნივერსიტეტი.
2. უნივერსიტეტში ხანძრის შემთხვევაში ევაკუაცია ხორციელდება N1 დანართით გათვალისწინებული ინსტრუქციის მიხედვით.

მუხლი 5. ხანძარსაწინააღმდეგო ინსტრუქტაჟი

1. ხანძარსაწინააღმდეგო ინსტრუქტაჟი უტარდება უნივერსიტეტის თანამშრომლებს სახანძრო უსაფრთხოების ძირითადი მოთხოვნების, ხანძარსაწინააღმდეგო დაცვის საშუალებების, აგრეთვე ხანძრის გაჩენის შემთხვევაში მათი ამოქმედების წესის შესწავლის მიზნით.

2. ხანძარსაწინააღმდეგო ინსტრუქტაჟი ტარდება უნივერსიტეტის პრეზიდენტის მიერ განსაზღვრული სახანძრო უსაფრთხოებაზე პასუხისმგებელი პირის მიერ, კანონმდებლობით დადგენილი მოთხოვნების გათვალისწინებით, ამ წესის შესაბამისად.
3. ხანძარსაწინააღმდეგო ინსტრუქტაჟის ჩატარება ითვალისწინებს უნივერსიტეტის თანამშრომელთა გაცნობას:
 - ა) უნივერსიტეტის ტერიტორიის, შენობის, მათ შორის, საევაკუაციო გზების, შიდა და გარე წყალსადენის, ხანძრის შესახებ მაუწყებლობის სისტემების მიმართ დადგენილ მოთხოვნებსა და ადამიანთა ევაკუაციის პროცესის მართვასთან;
 - ბ) ხანძარსაშიში სამუშაოების ჩატარების წესებთან;
 - გ) ხანძრის დროს თანამშრომელთა ვალდებულებებსა და მოქმედებებთან, სახანძრო-სამაშველო სამსახურის გამოძახების წესებთან, ხანძრის ჩაქრობის საშუალებების და სახანძრო ავტომატიკის დანადგარების გამოყენების მოთხოვნებთან.
4. ხასიათის და ჩატარების პერიოდულობიდან გამომდინარე, დადგენილია შემდეგი სახის ხანძარსაწინააღმდეგო ინსტრუქტაჟი: საწყისი, განმეორებითი და მიზნობრივი.
5. საწყისი ხანძარსაწინააღმდეგო ინსტრუქტაჟი უტარდება:
 - ა) დეპარტამენტში ახლად მიღებულ ყველა თანამშრომელს, მიუხედავად განათლებისა და პროფესიით (თანამდებობაზე) მუშაობის სტაჟისა;
 - ბ) უნივერსიტეტში სტაჟირებაზე/პრაქტიკაზე მიღებულ პირებს.
6. საწყისი ხანძარსაწინააღმდეგო ინსტრუქტაჟი მოიცავს შემდეგ საკითხებს:
 - ა) მონაცემებს ობიექტის (წარმოების) ხანძარ და ფეთქებადსაშიში პირობების სპეციფიკის და თავისებურებების შესახებ;
 - ბ) თანამშრომლების მოვალეობებს და პასუხისმგებლობას სახანძრო უსაფრთხოების მოთხოვნების დაცვაზე;
 - გ) ობიექტის ხანძარსაწინააღმდეგო რეჟიმის გაცნობას;
 - დ) ხანძარსაწინააღმდეგო რეჟიმის დაცვის თაობაზე ბრძანებების, სახანძრო უსაფრთხოების ინსტრუქციების, სამუშაო ადგილზე, საცხოვრებელ სათავსებში მომხდარი ან სავარაუდო ხანძრების ძირითადი მიზეზების გაცნობას;
 - ე) სახანძრო პროფილაქტიკის ზოგად ზომებს და ხანძრის ჩაქრობაზე მიმართულ ძირითად მოქმედებებს.
7. განმეორებითი ხანძარსაწინააღმდეგო ინსტრუქტაჟი უტარდება უნივერსიტეტის მოქმედ თანამშრომლებს არანაკლებ წელიწადში ერთხელ, პირველადი ხანძარსაწინააღმდეგო ინსტრუქტაჟის პროგრამის მიხედვით.
8. განმეორებითი ხანძარსაწინააღმდეგო ინსტრუქტაჟის დროს მოწმდება თანამშრომლების მიერ ობიექტში დადგენილი ხანძარსაწინააღმდეგო რეჟიმის მოთხოვნების, ხანძრის ჩაქრობის პირველადი საშუალებების, ევაკუაციის გზების გამოყენების ცოდნა. განმეორებითი ხანძარსაწინააღმდეგო ინსტრუქტაჟი ტარდება:
 - ა) სახანძრო უსაფრთხოების ნორმატიულ აქტებში ცვლილებების შეტანის და ახალი დოკუმენტების შემუშავების შემთხვევაში;

- ბ) უნივერსიტეტში ინფრასტრუქტურის, მოწყობილობის, სისტემების მოდერნიზაციის შემთხვევაში;
 - გ) თანამშრომლების მიერ სახანძრო უსაფრთხოების მოთხოვნების დარღვევისას, რომლებმაც გამოიწვიეს ან შეიძლება გამოიწვიონ ხანძარი;
 - დ) სხვა საგანმანათლებლო დაწესებულებაში ავარიების, ხანძრების შესახებ ცნობების მიღებისას;
 - ე) თანამშრომლების მიერ სახანძრო უსაფრთხოების მოთხოვნების არასათანადო ცოდნის შემთხვევაში.
9. მიზნობრივი ხანძარსაწინააღმდეგო ინსტრუქტაჟი ტარდება სტუდენტებისა და მოსწავლეების მონაწილეობით მასობრივი (50 ადამიანზე მეტი) ღონისძიებების ჩატარებისას და კანონმდებლობით დადგენილ სხვა შემთხვევებში.
 10. მონაცემები საწყისი, განმეორებითი და მიზნობრივი ინსტრუქტაჟის გავლის შესახებ შეიტანება „სახანძრო უსაფრთხოების ინსტრუქტაჟების აღრიცხვის ჟურნალში“ (დანართი N2), იმ პირების ხელმოწერით, რომლებმაც ჩატარეს და გაიარეს ინსტრუქტაჟი.
 11. უნივერსიტეტში არანაკლებ ნახევარ წელიწადში ერთხელ ტარდება ხანძრის დროს პერსონალის მოქმედებების გავარჯიშება შენობის ხანძარსაწინააღმდეგო დაცვის სისტემის ყველა ელემენტის გამართული მუშაობის შემოწმების პარალელურად.

მუხლი 6. პასუხისმგებლობა სახანძრო უსაფრთხოების წესების დარღვევისათვის

1. უნივერსიტეტის პერსონალი და სტუდენტი ვალდებულია მკაცრად დაიცვას დადგენილი სახანძრო უსაფრთხოების წესი და დაემორჩილოს ლოგისტიკისა და უსაფრთხოების დეპარტამენტის თანამშრომლ(ებ)ის მითითებებს;
2. პირის მიმართ, რომელიც დაარღვევს სახანძრო უსაფრთხოების წესებს, გამოიყენება აკადემიური კეთილსინდისიერებისა და დისციპლინის დაცვის დებულებით გათვალისწინებული შესაბამის ზომები.

**ხანძრის პირობებში ევაკუაციის უზრუნველყოფისათვის პერსონალის მოქმედებების
ინსტრუქცია**

№	მოქმედებების დასახელება	მოქმედებების წესი და თანმიმდევრობა	შემსრულებლი
1	შეტყობინება ხანძრის შესახებ	სახანძრო-სამაშველო სამსახურის გამოძახება ნომერზე --“112”	პირი, რომელმაც აღმოაჩინა ხანძარი
2	მაუწყებლობა ხანძრის შესახებ	ხანძრის შესახებ ინფორმაციის მიწოდება შენობაში მყოფი ადამიანებისათვის	ლოგისტიკისა და უსაფრთხოების დეპარტამენტი
3	ადამიანთა ევაკუაცია შენობიდან	ადამიანების ორგანიზებული გაყვანა ევაკუაციის გეგმის მიხედვით	ლოგისტიკისა და უსაფრთხოების დეპარტამენტი
4	ევაკუირებულთა აღრიცხვა	ევაკუირებული ადამიანების თავმოყრა სპეციალურად გათვალისწინებულ თავშეყრის ადგილზე, მათი აღრიცხვა, ვინაობის და რაოდენობის ფიქსირება	ლოგისტიკისა და უსაფრთხოების დეპარტამენტი
5	ხანძრის ჩაქრობა და ქონების ევაკუაცია	ხანძრის ჩაქრობის სამუშაოების ორგანიზება მისი აღმოჩენის მომენტიდან სახანძრო-სამაშველო დანაყოფის მისვლამდე; შეძლებისდაგვარად მატერიალურ ფასეულობათა ევაკუაცია	ლოგისტიკისა და უსაფრთხოების დეპარტამენტი
6	სახანძრო-სამაშველო დანაყოფის დახვედრა	სახანძრო-სამაშველო სამსახურების დახვედრა, ხანძრის ჩაქრობის ხელმძღვანელისათვის შექმნილი ვითარების შესახებ ინფორმაციის გადაცემა	ლოგისტიკისა და უსაფრთხოების დეპარტამენტის დირექტორი

განყოფილება, სამსახური

ხანძარსაწინააღმდეგო ინსტრუქტაჟის აღრიცხვის

ქ უ რ ნ ა ლ ი

დაიწყო “___” _____ 2015 წ.

დამთავრდა “___” _____ 2015 წ.

თარიღი	პირი, რომელსაც ჩაუტარდა ინსტრუქტაჟი (გვარი, სახელი, თანამდებობა)	დაზღვევის წელი	ინსტრუქტაჟის სახეობა	ინსტრუქტორის გვარი, სახელი თანამდებობა	ხელმოწერა	
					პირი, რომელსაც ჩაუტარდა ინსტრუქტაჟი	ინსტრუქტორი
	2	3	4	5	6	7